

Өмірі үлгілі ардагер

Қажырлы еңбегімен қала тарихында есімін қалдырған тұлғаларды насихаттау мақсатында №2 облыстық ғылыми-әмбебап кітапханасының өнер бөлімінде «Тыңда түлеген өркенді өмір» атты сұхбат-кеш өткізілді. Кештің құрметті мейманы, қаламыздың байырғы тұрғыны, еңбек ардагері – Түгел ЕРНАЗАРОВ.

Кешке Еңбек ардагерінен үлгі алар деген мақсатта қаламыздағы оқу орындарының бірі – Торғай аграрлық-техникалық колледжінің 1 курс оқушылары ұстазымен қатысты. Кешіміз Торғай аграрлық-техникалық колледжінің жас ұстазы, білімнің кітапхананың тұрақты оқырманы – Шыңғыс Кенжалиевтың арнауымен басталды. Кешті ұйымдастырушы әрі жүргізуші Әлия Қарсақбайқызы қонақты жақынырақ таныстырған соң, Қызылқозы тарихына қысқаша шолу жасады. Одан әрі іс-шара сұрақ-жауап түрінде өрбіді.

Түгел ағаның туған жері, жанұясымен, балалық шағымен таныстық. Сол кездегі халықтың жағдайы, жоқшылық заман, соғыс жылдары жайында Түгел ағаның өз аузынан естідік. Соғыс аяқталған соң, халықтың ал-ауахаты сәл жақсара бастады. Түгел ағамызда ел қатарлы мектепке барып, әріп таныды. Ол кісі үлкен ризашылықпен Қияқ, Ержанов Тұраш Ыбышев, Роза Әбдібекова, Қанапия Әбдібеков, Батырхан Балдиқов, Т. Искаков сияқты білімді ұстаздарын еске алды. Сол кісілердің берген білімінің арқасында, Целиноград ауыл-шаруашылық институтын «жерге орналастыру» маманы бойынша бітіріп шығады. Бұл өте «таңсық» мамандық еді.

Арқалық қаласына келіп ауыл-шаруашылық басқармасына инженер-жерге орналастырушы болып жұмысқа араласады. Осы жылдары тың игеру жұмысына



белсене қатысады. Түгел Ернараров жобасы бойынша Ковальский, Аңғар, Арқалық, Қайыңды совхоздарында қосымша жанадан тың жыртылып, игеріледі. Бүгінгі күнге дейін «жер орналастыру» деген көп кездеспейтін мамандықтың хас шебері Түгел ағамыз өз еңбегінің зейнетін көріп отырған жан. Бұл мамандықтан басқа геодезист, топограф, маркшейдер мамандықтарын да игерген. Осы білімінің арқасында, зейнетке шыққаннан кейін де «Алюминкурылыс» ЖШС, Торғай боксит кен басқармасында жұмыс атқарған. Еңбегінің арқасында қалалық, облыстық марапаттарға ие болған. Кеш барысында жастар орында сұрақтар қойып, Түгел ағаның мамандығына деген қызығушылықтарын байқатты.

Өнер бөлімінде ұйымдастырылған «Арқалық – ақ армандар тоғысқан қала» фото көрмесіне шолу жасалды. Кеш аяғында қадірлі қонаққа арналып әсем әннен шаңуу шашылып, жастар естелікке суретке түсті.

Осылайша, қарапайым еңбек адамының өмір жолы айтылып, жастарға үлгі болардай, тәрбиелік мәні бар іс-шара өз мәресіне жетті.

А. ТАМУЕВА,

№2 ОҒӘК бөлім кітапхана-шысы.